



Sofia Geisler  
Inatsisartunut ilaasortaq, Inuit Ataqtigiit

## § 37 naapertorlugu apeqqutip nr. 197/2020-p akineqarnera – Danmarkimi efterskolit pillugit

Asasara Sofia Geisler,

03-12-2020  
Suliap nr. 2020 - 24988  
Allagaat nr. 15447515

Inatsisartut suleriaasiat naapertorlugu apeqqtinnut qujanaq. Apeqqutigineqartut tullinnguuttuni akissuteqarfigissavakka.

Postbos 1029  
3900 Nuuk  
Oqarasuaat: +299 34 50  
00  
Email: ikin@nanoq.gl  
www.nanoq.gl

### 1. Ukiuni atuarfiusuni 2019/2020 aamma 2020/2021 maannamut Danmarkimi efterskolertut COVID-19 pissutigalugu atuarnerminnik taamaatitsiinnarlutik Nunatsinnut angerlarsimappat?

**Akissut:** Apeqqut ukiunut atuarfiusunut tulleriinneri malillugit 2019/2020-mut aamma 2020/2021-mut akineqarpoq.

#### Ukiunut atuarfiusumut 2019/2020-mut:

2020-mi martsimi Danmarkimi Covid-19-ip atuullaleriartarnerani efterskolertut 225-iusimapput Namminersorlutik Oqartussanit taperneqartartunik.

Taakkunangga atuartut 150-it Nunatsinnukarput Danmarkimi efterskolit matoorarnerrannut atatillugu. Atuartut sinneri 75-it matusisoqarnerani Danmarkimiiginnarput ilaqtutani attaveqaatiminniillutik imaluunniit efterskoliminniillutik.

Atuartunit 150-iusunit Nunatsinnukartunit atuartut 82-it Covid-19 pissutigalugu Nunatsinniiginnarput efterskolernertillu unitsillugu. Efterskolit 18. maj 2020-mi ammaqqinnerannut atatillugu atuartut 66-it Danmarkimukaqqipput. Taakku saniatigut efterskolertut marluk Nunatsinnit najugarisaq qimannagu atuartitsinikkut atuarnertik naammassivaat.

Ukiuni atuarfiusumi 2019/20-mi kalaallit katillugit 143-t Danmarkimi efterskolernertik naammassivaat.

#### Ukiuq atuarfiusoq 2020/2021:

Ukiuq manna atuarfiusup aallartinnerani atuartut 185-it Danmarkimi efterskolernissamut taperneqarsimapput.

24. november 2020-mi atuartunit 185-iusunit 13-init efterskolernertik unitsissimavaat, taakkunangalu atuartut tallimat Covid-19-imut ernumanertik tunngavigisimavaat.

Kisitsisit paasissutissiissutigineqartuni ilaapput atuartut Danmarkimi efterskolernissaminnut Namminersorlutik Oqartussanit taperneqarsimasut. Taakku saniatigut kalaallit Danmarkimi efterskolini atuartoqarpoq angajoqqaavisa namminneq aaqqissugaannik akiligaannillu – atuartut taakku Ilinniartitaanermut Aqutsisoqarfimmi

efterskolertunut tunngasunik aqutsisunit nalunaarsorneqartanngillat 'nammineertutullu' taaneqartarlutik.

## **2. Inuusuttut taakku ilinniartitaanerup aqqissuussaaffiani katataatikkumanagit iliuseqarfiginissaannut periarfissat suut Naalackersuisunit tikkuarneqarsinnaappat?**

### **Akissut:**

GUX Aasianni ilinniagaq GUX-P aallartippoq pilersaarutaasut ukioq ataaseq sioqqullugu ilaatigut efterskolernerminnik unitsitsiinnartut atuagarsormik amigaateqartut ilinniartuutigiumallugit. Aamma 2020-mi qinnuteqarnissamut killigititaq 30. junimut kinguartinneqarpoq nalinginnaasumik 1. martsimut killeqaraluartoq inuusuttut Covid-19 pissutigalugu ukioq taanna ilinniarnertuunngorniarfinni aallartissinnaanngitsunut inissaqartitsiumalluni.

Atuartut amerlanerpaat Danmarkimi efterskolerniarlutik toqqaasut Nunatsinni 10. klasse naammassigaangamikku efterskolerniarlutik meeqqat atuariannit inaarutaasumik soraarummeersimagaangamik.

Atuartut amerlanertigut meeqqat atuarianni angusaminnik, oqaatsinik sungiusarniarlutik imaluunniit inuttut inerinriarlutik Danmarkimi efterskolerniarlutik toqqartarpaat ilinniakkamik aallartitsinnginnermini.

Atuartup efterskolernerminik unitsitsiinnartoq meeqqat atuariannit inaarutaasumik soraarummeerneqanngippat inatsit atuuttut tunngavigalugit atuaqqissinnaavoq meeqqat atuarianni inaarutaasumik misilitsereermermi nalilersuutai piniarlugit.

Aamma meeqqat atuarianni ilinniartitsissutit arlallit Majoriami malinnaavigineqarsinnaapput kingorna meeqqat atuarianni oqaluttariarsormik allattariarsormillu inaarutaasumik misilitsissutaasinnaallutik, tamannalu Majoriami ukiumut marloriarluni pisarpoq, tassa decemberimi aamma maj/junimi. Majoriami aamma nammineq atuarnikkut meeqqat atuarianni inaarutaasumik soraarummeernissamut misilitsinniarluni periarfissaqarpoq. Tassunga piumasaqaatit atuartut ataasiakkaat Majoriallu akornanni isumaqatigiissutigineqassapput.

Kalaallit Nunaanni ilinniartitaanermut inuussutissarsiutinillu siunnersuisarneq pillugu Namminersorlutik Oqartussat inatsisaat nr. 4, 29. november 2013-meersoq maliillugu Majoriap aamma pisussaaffigaa inuusuttunut 18-iliineqanngitsunut taakkunungalu angajoqqaatut oqartussaasunut ornigulluni siunnersuinissaq, inuusuttoq meeqqat atuarianni naammassinereerluni ilinnialersimangippat imaluunniit inuussutissarsiulersimangippat imaluunniit ilinniakkaminik unitsitsiinnarsimappat, assersuutigalugu efterskolernerminik unitsitsiinnarsimappat.

Taamatut siunnersuinerup siunertaraa inuusuttumut ilinniarnissamut pilersaarutip malitseqartinneqarnissaa imaluunniit inuusuttoq meeqqat atuariannit iliussissatut pilersaarummik peqanngippat ilinniarnissaanut pilersaarusiortuni.

## **3. Taamaappat; pilersaarutit suut Naalackersuisut tikkuarsinnaavaat?**

**Akissut:** Apeqqut 2-mut akissut takuuk.

#### 4. Paasissutissanik allanik uunga attuumassuteqartunik Naalackersuisut peqarpat?

**Akissut:** Atuartut ukiumi atuarfiusumi 2019/2020-mi Covid-19 pissutigalugu efterskolernerminnik unitsitsiinnartut efterskolernerminnik unitsitsiinnarmata efterskolersimanerminnik uppernarsaammik allagartaqalernaviangillat. Tamanna tunulequtaralugu ilinniartitaanermut Aqutsisoqarfiup atuartut pineqartut efterskoliinut inassutigaa kalaallinut atuartunut Covid-19 pissutigalugu ammaasseqqinnermi efterskolernerminnik nangitsinngitsunut uppernarsaammik tunineqassasut. Uppernarsaat taanna atuartut efterskolersimanerminnut uppernarsaatinut ilaliullugu atorsinnaavaat, assersuutigalugu inuusuttunut ilinniarfinnut qinnuteqarneni.

Efterskolit pisarnermissut atuartut sapinggisanguartik tamaat atorlugu paarilluarniartarpaat. Taamaammat atuartut angajoqqaallu Danmarkimi efterskolertitsisarneq ernumagissangilaat, aamma maanna Covid-19-ip atuunnerani.

Majimi ammaaqqinnermi oqartussat Covid-19-imut maleruaqqusaat efterskolit, atuartitsiviit namminersortut atuarfiillu najugaqarfigiutigalugu nerisaqarfiit malissimavaat. Assersuutigalugu qanoq atuartitsisoqartassanersoq, nerisitsisoqartassanersoq, inuttut ataatsimuualaartoqartassanersoq, atuartunik napparsimasunik qanoq passussisoqartassanersoq, timersortoqassanersoq qanorlu eqqiaasoqartassanersoq malittarisassiortoqarnikuuvoq. Maleruagassat taakku ingerlaavartumik nutarterneqartarput.

Kalaallit Illui, Efterskoleforeningen i Danmark, Efterskolit pillugit aqutsisoqarfik aamma Naalackersuisut Danmarkimi efterskolertarnermut tunngasunik qanimut suleqatigiissutigaaat Covid-19-ilu pillugu efterskolinilu pissutsit tamanit malinnaavigineqarput.

Inussiarnersumik inuulluaqqusillunga

  
Katti Frederiksen